

大唐創業起居注  
鑑附考異(二)







大 唐 創 業 起 居 注

溫 大 雅 撰

本館叢書集成初編所選唐  
宋叢書津逮祕書及祕書二  
十一種學津討原皆收有此  
書唐宋津逮兩本在前津逮  
本較佳故據以排印



# 大唐創業起居注卷一

唐陝東道大行臺工部尙書上柱國樂平郡開國公臣溫大雅撰

起義旗至發引凡四十八日

初帝自衛尉卿轉右驍衛將軍奉詔爲太原道安撫大使郡文武官治能不稱職者並委帝黜陟選補焉河東已來兵馬仍令帝徵發討捕所部盜賊隋大業十二年煬帝之幸樓煩時也帝以太原黎庶陶唐舊民奉使安撫不踰本封因私喜此行以爲天授所經之處示以寬仁賢智歸心有如影響煬帝自樓煩遠至鴈門爲突厥始畢所圍事甚平城之急賴太原兵馬及帝所徵兵聲勢繼進故得解圍僅而獲免遂向東都仍幸江都宮以帝地居外戚赴難應機乃詔帝率太原部兵馬與馬邑郡守王仁恭北備邊朔帝不得已而行竊謂人曰匈奴爲害自古患之周秦及漢魏歷代所不能攘相爲勅敵者也今上甚憚塞虜遠適江濱反者多于蝟毛羣盜所在蜂起以此擊胡將求以濟天其或者殆以俾余我當用長策以馭之和親而使之令其畏威懷惠在茲一舉既至馬邑帝與仁恭兩軍兵馬不越五千餘人仁恭以兵少甚懼帝知其意因謂之曰突厥所長惟恃騎射見利卽前知難便走風馳電卷不恆其陳以弓矢爲爪牙以甲冑爲常服隊不列行營無定所逐水草爲居室以羊馬爲軍糧勝止求財敗無慙色無警夜巡晝之勞無構壘饋糧之費中國兵行皆反于是與之角戰罕能立功今若同其所爲習其所好彼知無利自然不來當

今聖主在遠。孤城絕援。若不決戰。難以圖存。仁恭以帝隋室之近親。言而詣理。聽帝所爲。不敢違異。乃簡使能騎射者二千餘人。飲食居止。一同突厥。隨逐水草。遠置斥堠。每逢突厥候騎。旁若無人。馳騁射獵。以曜威武。帝尤善射。每見走獸飛禽。發無不中。嘗卒與突厥相遇。驍銳者爲別隊。皆令持滿。以伺其便。突厥每見帝兵。咸謂以其所爲。疑其部落。有引帝而戰者。常不敢當。辟易而去。如此再三。衆心乃安。咸思奮擊。帝知衆欲決戰。突厥畏威。後與相逢。縱兵擊而大破之。獲其特勤所乘駿馬。斬首數百千級。自爾厥後。突厥喪膽。深服帝之能兵。收其所部。不敢南入。時有賊帥王漫天別黨。衆逾數萬。自號歷山飛。結營於太原之南境。上黨。西河。京都道路斷絕。煬帝後十三年。勅帝爲太原留守。仍遣獸<sub>唐諱</sub>賁郎將王威。獸牙郎將高君雅。爲副。帝遂私竊喜甚。而謂第二子秦王等曰。唐固吾國。太原卽其地焉。今我來斯。是爲天與。與而不取。禍將斯及。然歷山飛不破。突厥不和。無以經邦濟時也。旣而歷山飛衆數不少。劫掠多年。巧於攻城。勇於力戰。南侵上黨。已破將軍慕容。將軍羅侯之兵。北寇太原。又斬將軍潘長文首。頻勝兩將。所向無前。於是帝率王威等。及河東太原兵馬。往討之。於河西雀鼠谷口。與賊相遇。賊衆二萬餘人。帝時所統步騎纔五六千而已。威及三軍。咸有懼色。帝笑而謂威等曰。此輩羣盜。惟財是視。頻恃再勝。自許萬全。鬪力而取。容未能克。以智圖之。事無不果。所憂不戰。戰必破之。幸無憂也。須臾。賊陣齊來。十許里間。首尾相繼。去帝漸近。帝乃分所將兵爲二陣。以羸兵居中。多張幡幟。盡以輜重繼後。從旌旗鼓角。以爲大陣。又以麾下精兵數百騎。分置左右隊。爲小陣。軍中莫識所爲。及戰。帝遣王威領大陣。居前。旌旗從。賊衆遙看。謂爲帝

之所在。乃帥精銳。競來赴威。及見輜馱。捨鞍爭取。威怖而落馬。從者挽而得脫。帝引小陣左右二隊。大呼而前。夾而射之。賊衆大亂。因而縱擊。所向摧陷。斬級獲生。不可勝數。而餘賊黨老幼男女數萬人。並來降附。於是郡境無虞。年穀豐稔。感帝恩德。若亢陽之逢膏雨焉。後突厥知帝已還太原。仁恭獨留無援。數侵馬邑。帝遣副留守高君雅。將兵與仁恭并力拒之。仁恭等違帝指蹤。遂爲突厥所敗。旣而隋主遠聞。以帝與仁恭不時捕虜。縱爲邊患。遂遣司直馳驛。繫帝而斬仁恭。帝自以姓名著於圖籙。太原王者所在。慮被猜忌。因而禍及。頗有所晦。時皇太子在河東。獨有秦王侍側耳。謂王曰。隋曆將盡。吾家繼膺符命。不早起兵者。顧爾兄弟未集耳。今遭姜里之厄。爾昆季須會盟津之師。不得同受孛戮。家破身亡。爲英雄所笑。王泣而啓帝曰。芒碭山澤。是處容人。請同漢祖。以觀時變。帝曰。今遇時來。逢茲錮繫。雖視機變。何能爲也。然天命有在。吾應會昌。未必不以此相啓。今吾勵謹。常敬天之誠。以卜興亡。自天祐吾。彼焉能害。天必亡我。何所逃刑。爾後數日。果有詔使馳驛而至。釋帝而免仁恭。各依舊檢校所部。煬帝之幸江都也。所在路絕。兵馬討掩。來往不通。信使行人。無能自達。惟有使自江都。至于太原。不逢劫掠。依程而至。衆咸異焉。初使以夜至太原。溫顏將宿於城西門樓上。首先見之。喜其靈速。報兄彥弘。馳以啟帝。帝時方臥。聞而驚起。執彥弘手而笑曰。此後餘年。實爲天假。退謂秦王曰。吾聞惟神也。不行而至。不疾而速。此使之行。可謂神也。天其以此使促吾當見機而作。雄斷英蕩。從此遂定。帝素懷濟世之略。有經綸天下之心。接待人倫。不限貴賤。一面相遇。十數年不忘。山川衝要。一覽使憶。遠近承風。咸思託附。仍命皇太子於河東潛結英俊。秦

王於晉陽密招豪友。太子及王俱稟聖略。傾財賑施。卑身下士。逮乎鬻繒博徒。監門廝養。一技可稱。一藝可取。與之抗禮。未嘗云倦。故得士庶之心。無不至者。十三年。歲在丁亥。正月丙子夜。晉陽宮西北有光夜明。自地屬天。若大燒火。飛焰炎赫。正當城西龍山上。直指西南。極望竟天。俄而山上當童子寺左右。有紫氣如虹。橫絕火中。上衝北斗。自一更至三更而滅。城上守更人咸見。而莫能辨之。皆不敢道。大業初。帝爲樓煩郡守。時有望氣者。云西北乾門有天子氣。連太原甚盛。故隋主於樓煩置宮。以其地當東都西北。因過太原。取龍山風俗道。行幸以厭之。云。後又拜代王爲郡守以厭之。二月己丑。馬邑軍人劉武周殺太守王仁恭。據其郡。而自稱天子。國號定楊。武周竊知煬帝於樓煩築宮厭當時之意。故稱天子。規以應之。帝聞而歎曰。頃來羣盜遍于天下。攻略郡縣。未有自謂王侯者焉。而武周豎子。生於塞上。一朝歛起。輕竊大名。可謂陳涉狐鳴。爲沛公駢除者也。然甚欲因此起兵。難于先發。私謂王威、高君雅等曰。武周雖無所能。僭稱尊號。脫其進入汾源宮。我輩不能翦除。並當滅族矣。雅大懼。固請集兵。帝察威等情切。謬謂之曰。待據樓煩。可微爲之備。宜示寬閑。以寧所部。三月丁卯。武周南破樓煩郡。進據汾源宮。帝謂官僚曰。兵可戒嚴。城可守備。糧可賑給。三者當今廢一不可。須預部分。惟諸公斷之。威等計無所出。拜而請帝曰。今日太原士庶之命。懸在明公。公以爲辭。孰能預此。帝知衆情歸己。乃更從容謂之曰。朝廷命將出師。皆稟節度。未有闕外敢得專之。賊據離宮。自稱天子。威福賞罰。隨機相時。以此攻城。何城不克。汾源去此數百里間。江都懸隔三千餘里。關河襟帶。他賊據之。聞奏往來。還期莫測。以嬰城膠柱之兵。當巨猾豕突之勢。諮文

人以救火。其可撲滅乎。公等國之爪牙。心如鐵石。欲同戮力。以除國難。公家之利。見則須爲。俾其無猜。期于報効。所以詢議。擇善行之。是非憚於治兵。敢辭戎首。威等對曰。公之明略。遠近備知。地在親賢。與國休戚。公不竭力。誰盡丹誠。若更逡巡。羣情疑駭。帝若不得已而從之。衆皆悅服。懼而聽命。帝以王威兼任太原郡丞。爲人清恕。令與晉陽宮監裴寂。相知檢校倉糧。賑給軍戶口。高君雅常守高陽。得無失脫。遣巡行城池。及捍禦器械。以兵馬鎧仗戰守事機。召募勸賞。軍民徵發。皆須決於帝。太原左近聞帝部分募兵備邊。所在影赴。旬日之頃。少長得數千人。兵司總帳以聞。請安營處。帝指興國寺曰。勤王之師。不謀而至。此其興國者焉。宜于此寺安處。恐威雅猜覺。亦不之閱問。私謂秦王等曰。紀綱三千。足成霸業。處之興國。可謂嘉名。仍遣密使往蒲州。催追皇太子等。是月也。朔方郡人梁師都。又殺郡官而稱天子。初。帝遣獸牙郎將高君雅。與馬邑守王仁恭。防遏突厥。雅違帝旨。失利而還。帝恐煬帝有責。便欲據法繩雅。雅是煬帝舊左右。慮被猜嫌。忍而弗問。雅性庸佞。不知慙屈。帝甚得太原內外人心。瞻仰龍顏。疑有異志。每與王威密伺帝隙。有鄉長劉龍者。晉陽之富人。也。先與宮監裴寂引之謁帝。帝雖知其微細。亦接待之以招客。君雅又與龍相善。龍感帝恩。賄竊知雅等密意。具以啓聞。帝謂龍曰。此輩下愚。闕于時事。同惡違衆。必自斃也。然卿能相報。深有至誠。幸勿有多言。我爲之所。夏五月癸亥夜。帝遣長孫順德。趙文恪等。率興國寺所集兵五百人。總取秦王部分。伏于晉陽宮城東門之左。以自備。甲子旦。命晉陽縣令劉文靜。導開陽府司馬劉正會。辭告高君雅。王威等。與北蕃私通。引突厥南寇。帝集文武官僚。收威等繫獄。丙寅。而突厥數萬騎。



抄逼太原。入自羅郭北門。取東門而出。帝分命裴寂、文靜等守備諸門。並令大開不得輒閉。而城上不張旗幟。守城之人不許一人外看。亦不得高聲。示以不測。衆咸莫知所以。仍遣首賊帥王康達率其所部千餘人。與志節府鷹揚郎將楊毛等潛往北門隱處設伏。誠之待突厥過盡。抄其馬羣。擬充軍用。然突厥多帝登宮城東南樓望之。旦及日中。騎塵不止。康達所部。並是驍銳。勇于抄劫。日可食時。謂賊過盡。出抄其馬。突厥前後夾擊。埃塵漲天。逼臨汾河。康達等既無出力。並墜汾而死。唯楊毛等一百人浮而得脫。城內兵數無幾。已喪千人。軍民見此勢。私有危懼。皆疑王威君雅召而至焉。恨之愈切。帝神色自若。權甚于常。顧謂官僚曰。當今天下賊盜十室而九。稱帝圖王。專城據郡。孤荷文皇殊寵。思報厚恩。欲與諸賢立功王室。適欲起兵。威雅沮衆。深相猜忌。密搆異謀。欲加之罪。疑其私通境外。豈謂繫之二日。甲子是十五日。丙寅是十七日。突厥果入太原。此殆天心爲孤罰罪。非天意也。何從而至。天旣爲孤遣來。還應爲孤令去。彼若不去。當爲諸軍遣之。無爲慮也。帝以見兵未多。又失康達之輩。戰則衆寡非敵。緩恐入掠城外居民。夜設伏兵出城。以據險要。曉令他道而入。若有來援。仍誠出城將士。遙見突厥。則速據險。勿與共戰。若知其戰去。必莫追之。但送出境而還。使之莫測。爾後再宿。突厥達官自相謂曰。唐公相貌有異。舉止不凡。智勇過人。天所與者。前來馬邑。我等已大畏之。今在太原。何可當也。且我輩無故遠來。他又不與我戰。開門待我。我不能入。久而不去。天必瞋我。我以唐公爲人。復得天意。出兵要我。盡死不疑。不如早去。無住取死。己亥夜。潛遁。明旦城外覘入馳報。帝曰。我知之矣。文武官入賀。帝曰。且莫相賀。當爲諸官召而使之。卽立自手疏與突厥書。

曰。何所聞而來。何所見而去。自去自來。豈非天所爲也。我知天意。故不遣追。汝知天意。亦須同我。當今隋國喪亂。蒼生困窮。若不救濟。總爲上天所責。我今大舉義兵。欲寧天下。遠迎主上。還共突厥和親。更似開皇之時。豈非好事。且今日陛下雖失可汗之意。可汗寧忘高祖之恩也。若能從我。不侵百姓。征伐所得。子女玉帛。皆可汗有之。必以路遠。不能深入。見與和通。坐受寶玩。不勞兵馬。亦任可汗。一二便宜。任量取中。仍命封題署云某啓。所司報請云。突厥不識文字。惟重貨財。願加厚遺。改啓爲書。帝笑而謂請者曰。何不達之深也。自頃離亂。亡命甚多。走胡奔越。書生不少。中國之禮。併在諸夷。我若敬之。彼仍未信。如有輕慢。猜慮愈深。古人云。屈于一人之下。伸于萬人之上。塞外羣胡。何比擬凡庸之一耳。且啓之一字。未直千金。千金尙欲與之。一字何容有恠。此非卿等所及。迺遣使者馳驛送啓。始畢得書大喜。其部達官等曰。我知唐公非常人也。果作異常之事。隋主前在鴈門。人馬甚衆。我輩攻之。竟不敢出。太原兵到我等畏之。若神皆走還也。天將以太原與唐公。必當平定天下。不如從之。以求寶物。但唐公欲迎隋主。共我和好。此語不好。我不能從。隋主爲人。我所知悉。若迎來也。卽忌唐公。於我舊怨。決相誅伐。唐公以此喚我。我不能去。唐公自作天子。我則從行。覓大勳賞。不避時熱。當日卽以此意作書報帝。使人往還。不踰七日。使至前日。所賀官僚。舞蹈稱慶。帝開書歎息。久之曰。非有天命。此胡寧豈如此。但孤爲人臣。須盡節。主憂臣辱。當未立功。欲舉義兵。欲戴王室。大名自署。長惡無君。可謂階亂之人。非復尊隋之事。本慮兵行以後。突厥南侵。屈節連和。以安居者。不謂今日所報。更相要逼。乍可絕好蕃夷。無有從其所勸。突厥之報帝書也。謂使人曰。

唐公若從我語。卽宜急報。我遣大達官往取進止。官僚等以帝辭色凜然。莫敢咨諫。興國寺兵知帝未從。突厥所請。往往偶語曰。公若更不從突厥。我亦不能從公。裴寂、劉文靜等知此議。以狀啓聞。帝作色曰。公等並是隋臣。方來共事。以此勸孤。臣節安在。裴寂等對曰。儻使伊呂得盡誠于桀紂。卽不爲湯武之臣。寂等改以事君。不敢拘于小節。且今士衆已集。所乏者馬。蕃人未是急須。胡馬待之如渴。若更遲留。恐其有悔。帝曰。事不師古。鮮能克成。諸賢宜更三思。以謀其次。六月己卯。太子與齊王至自河東。帝懼甚。裴寂等乃因太子秦王等入啓。請依伊尹放太甲。霍光廢昌邑故事。廢皇帝而立代王。興義兵以檄郡縣。改旗幟以示突厥。師出有名。以輯夷夏。帝曰。如此所作。可謂掩耳盜鍾。事機相迫。不得不爾。雖失意于後主。幸未負于先帝。衆議旣同。孤何能易。所恨元首叢脞。股肱墮哉。歎歎不得已。裴寂等曰。文皇傳嗣。後主假權。楊素亡國喪家。其來漸矣。民怨神怒。降茲禍亂。致天之罰。理亦其宜。於是遣使以衆議。馳報突厥。始畢依旨。卽遣其柱國康鞘利。級失、熱寒、特勤、達官等。送馬千疋。來太原交市。仍許遣兵送帝往西京。多少惟命。康鞘利將至。軍司以兵起甲子之日。又符讖尙白。請建武王所執白旗。以示突厥。帝曰。誅紂之旗。牧野臨時所仗。未入西郊。無容預執。宜兼以絳雜半續之。諸軍稍旛皆放此。營壁城壘。幡旗四合。赤白相映。若花園開皇初。太原童謠云。法律存。道德在。白旗天子出東海。常亦云。白衣天子。故隋主恆服白衣。每向江都。擬于東海。常修律令。筆削不停。并以綵畫五級木壇。自隨以事道。又有桃李子歌曰。桃李子。莫浪語。黃鸝繞山飛。宛轉花園裏。案李爲國姓。桃當作陶。若言陶唐也。配李而言。故云。桃花園宛轉。屬旛幡。汾晉老幼。謳

譟在耳。忽覩靈驗。不勝懽躍。帝每顧旗幟。笑而言曰。花園可爾。不知黃鵠如何。吾當一舉千里。以符冥讖。自爾已後。義兵日有千餘集焉。二旬之間。衆得數萬。裴寂等啓曰。義軍漸大。宜有司存。官僚所統。須有肆屬。帝曰。布衣之士。或假名竊位。孤實將軍。居唐大宇。近捨于此。更欲何求。裴寂等請進位大將軍。以隆府號。不乖古今。權藉威名。帝曰。卿以二立相期。欲孤爲霍光之任。威在將軍。何關大也。必須仍舊。亦任加之。署置府僚長史已下。功次取之。量能受職。裴寂等又請置諸軍并兵士等總號。帝曰。諸侯二軍。春秋所許。孤今霸業。差擬晉文。可作三軍。分置左右。謀簡統帥。妙選其人。諸軍既是義兵。還可呼爲義士。昔周武克殷。義士非其薄德。况今未有所克。敢忘義士者乎。太原遼山縣令高斌廉。拒不從命。仍遣使問行往江都。奏帝舉兵。煬帝惡李氏據有太原。聞而甚懼。乃勅東都西京。嚴爲備禦。西河不時送款。帝曰。遼山守株。未足爲慮。西河繞山之路。當吾行道。不得留之。六月甲申。乃命大郎二郎率衆取之。除程命費三日之糧。時文武官人。並未署置。軍中以次第呼太子秦王爲大郎二郎焉。臨行。帝語二兒曰。爾等少年。未之更事。先以此郡觀爾所爲。人具爾瞻。咸宜勉力。大郎二郎跪而對曰。兒等早蒙弘訓。稟教義方。奉以周旋。不敢失墜。家國之事。忠孝在焉。故從嚴令。事須稱旨。如或有違。請先軍法。帝曰。爾曹能爾。吾復何憂。于時義師初會。未經講閱。大郎等慮其不攻。以軍法爲言。三軍聞者。人皆自肅。兵向西河。大郎二郎在路。一同義士等。其甘苦。齊其休息。風塵警急。身卽前行。民間近道果菜已上。非買不食。義士有竊取者。卽遣求主爲還價。亦不詰所竊之人。路左有長老。或進蔬食壺漿者。重傷其意。非其所見。軍人等同分。未嘗獨受。如有牛酒。

饋遺。案輿來者，勞而遣之曰：「此隋法也。吾不敢，頗慮前人有限，遂爲終日不食以謝之。」於是將士見而感悅。人百其勇，至西河城下。大郎二郎不甲，親往喻之。城外欲入城，人無問男女小大，並皆放入城內。既見義軍寬容至此，咸思奔赴。唯有郡丞高德儒執迷不反。己丑，以兵臨之，飛梯纒進，衆皆爭上。郡司法書佐朱知瑾等從城上引兵而入，執德儒以送軍門。德儒，卽隋之見鸞人也。大郎二郎等數之曰：「卿逢野鳥，謬道見鸞，佞惑隋侯，以爲祥瑞。趙高指鹿爲馬，何相似哉！」義兵今獎王室，理無不殺趙高之輩，仍命斬焉。自外不戮一人。秋，毫不犯，往還九日。西河遂定，師歸。帝聞喜曰：「以此用兵天下，橫行可也。」是日，卽定入關之策。癸巳，以世子爲隴西公，爲左領軍大都督。左三統軍等隸焉。二郎爲燉煌公，爲右領軍大都督。右三統軍等隸焉。世子乃爲太原郡守，命裴寂、劉文靜爲大將軍府長史司馬，以殷開山、劉正會、溫大雅、唐儉、權弘壽、盧階、思德平、武士彠等爲掾屬記室參左等官，以鷹揚王長階、姜寶誼、揚毛、京兆長孫順德、寶琮、劉弘基等分爲左右統軍副統軍。自外文武職員，隨才詮用。其平旦，有僧俗姓李氏，獲白雀而獻之。至日未時，又有白雀來止帝牙前樹上。左右復捕獲焉。明旦，有紫雲見于天。當帝所坐處，移時不去。旣而欲散，變爲五色，皆若龍獸之象。如此三朝，百姓咸見。文武謁賀，帝皆抑而不受。丙申，突厥柱國康鞘利等并馬而至。舍之於城東興國玄壇，鞘利見老君尊容，皆拜。道士賈昂見而謂同郡溫彥將曰：「突厥來詣唐公，而先謁老君，可謂不失尊卑之次。非天所遣，此輩寧知禮乎？」丁酉，帝引康鞘利等，禮見於晉陽宮東門之側。舍受始畢，所送書信，帝爲貌恭厚，加饗賄鞘利等。大悅，退相謂曰：「唐公見我蕃人，尙能屈意，見諸華夏，情何



可論。敬人者，人皆敬愛。天下敬愛，必爲人主。我等見之，人不覺自敬。從此以後，帝每見鞘利等，愈加敬畏，不失蕃臣之禮。其馬千疋，唯市好者，而取其半。義士等咸自出物，請悉買之。帝曰：彼馬如羊，方來不已，吾恐爾輩不能買之。胡人貪利無厭，其欲少買，且以見貧，示其非急于馬。吾當共之。貢市不用爾物，毋爲迫役。自費家財，已而高陽郡靈壽賊帥郗士陵，以其黨數千人款附，卽授鎮東將軍，封燕郡公。仍置鎮東府，具補僚屬，以招撫山東郡縣。乙巳，康鞘利等還蕃，乃命司馬劉文靜報使，並取其兵。靜辭，帝私誠之曰：胡兵相送，天所遣來，敬煩天心，欲存民命，突厥多來，民無存理，數百之外，無所用之。所防之者，恐武周引爲邊患。又胡馬牧放，不煩粟草，取其聲勢，以懷遠人，公宜體之，不須多也。



# 大唐創業起居注卷二

起自太原至京城凡一百二十六日

秋七月壬子。以四郎元吉爲太原郡守。留守晉陽宮。文武後事。並委焉。義師欲西入關。移營於武德南。癸丑。將引帝立軍門。仗白旗而大號誓衆。文曰。夫天地定位。否泰迭其盛衰。日月著明。虧昃貶其貞滿。惟神莫測。尚乃盈虛。矧茲王道。能無悔悛。克先帝世。炎漢商周。撥亂乘乾。多歷年所。厥嗣墜緒。時屬艱危。則其股肱宰衡。藩屏親戚。戮力同獎。推心翼戴。顛或可扶。糺合而奔。官守惡不可救。廢放而安宗社。伊霍桓文。並其人也。率爾踵武。代有其事。布在方策。可得而言。日者蒼精云謝。炎運將啓。上天眷命。屬乎隋室。於是我高祖文皇帝以后父之尊。周親入相。豹變陝左。龍飛漢東。誅尉適於韓魏。則神鉦遏響。勦王讎於巴蜀。則靈山斯鏤。四罪咸服。九有樂推。經綸帷幄之間。揖讓巖廊之內。造我區夏。不更朞月。舜禹以來。受終未有如斯之易者。以故臨朝恭已。庶績爲心。親覽萬機。平章百姓。兢兢慎于馭朽。翼翼懼於烹鮮。齊六合爲一家。等黔黎于赤子。有陳不率。殄虐政於江湖。獯醜相屠。降封虜于沙漠。其吊民也如彼。其和戎也若茲。散馬牛於山林。鑄劍戟爲農器。求瘼恤隱。訟息刑清。輕徭薄賦。家給人足。倉庫流行于里閭。職貢委輸于帑藏。豈獨水衡貫朽。常平粟紅而已哉。加以愛民治國。節用而敦本。深根固蒂。因河而踐華。肆覲朝宗。止於京邑。玄覽縱觀。弗踰岐下。遐邇叶和。內外禔福。凱澤洋溢。休祥紹至。一世之氓。咸賴仁壽。二紀之治。可

謂隆平。揚摧往初。歷選前辟。詩書所美。莫之能尙。然聖人千慮。失於知子。以正萬國。輕易元良。廢守器之長。立不才之庶。兆亂之萌。於是乎在。異哉今上之行己也。獨智自賢。安忍忌刻。拓狂悖爲混沌。苟鳩毒爲恣睢。飾非好佞。拒諫信讒。敵怨誠良。仇讎骨肉。巡幸無度。窮兵極武。喜怒不恆。親離衆叛。御河導洛。肆舳艦而達江。馳道緣邊。徑長城而傍海。離宮別館之所在。車轍馬跡之所向。咸慙山而陘谷。畢結瑤而構瓊。遼水屢征。殲丁壯於億兆。伊谷轉輸。敵老幼於百萬。禽荒罄於飛走。蠶食窮於水陸。征税盡於重斂。民力殫於勞止。十分天下。九爲盜賊。荆棘旅于闕廷。豺狼充於道路。帶牛佩犢。輟耕者連孤竹。而寇潢池。鋤耨棘矜。大呼者聚薳蒲。而起芒澤。青羗白狄。剽夷道而□□。黃巾赤眉。屠閭左而竊號。曝骸如莽。僵尸若麻。敵國滿畫鷁之舟。胡越繞和鸞之轂。四海波振而冰泮。五嶽塵飛而土崩。踞積薪以待然。鉗衆口而寄坐。明明皇祖。貽厥無人。赫赫宗隋。滅爲亡國。某以庸虛。謬蒙嘉惠。承七葉之餘慶。資五世之克昌。遂得地臣戚里。家稱公室。典驍衛之禁兵。守封唐之大宇。義無坐觀綴旒之絕。不舉勤王之師。苟利社稷。專之可也。廢昏立明。敢遵故實。今便與甲晉陽。奉尊代邸。掃定咸維。集寧寓縣。放後主于江都。復先帝之鴻績。固配天子園寢。存司牧于蒼生。豈謂一朝言及於此事。不獲已。追增感歎。凡厥士民。義旅豪傑。敏究時難。曉達權謀。家怨國恥。雪乎今日。從我同盟。無爲貳志。有渝此盟。神其殛之。仍命以此誓辭。檄喻所在郡縣。并命檄書。勿得因循。妄論軍勢。帝性簡質。大度豁如。前代自矜遠嫌之事。皆以恕實行之。不爲欺給。自然反經合義。妙盡機權。類皆如此。其義士等各以名到先後爲次第。汎加宣惠。綏德二尉官。帝謂行之等曰。吾未

特爲此官。示宣行惠。知綏撫以德。使遠者知有征無戰。見我心焉。是夕。次於清源。牧馬置營。皆據高險。老弱樵採。丁壯休息。虞候覘守之地。飛鳥不通。勿論人也。帝乃將世子及敦煌公等。率家僮十數。巡行營幕。次比器仗精粗。坐臥飲食。糧稟升斗。馬驢饑飽。逮乎僕隸。皆親閱之。如有不周。卽令從人借助。亦不責所屬典司。顧謂二兒曰。天下神器。聖人大寶。非符命所屬。大功濟世。不可妄居。所以納揆試艱。虞登帝位。櫛風沐雨。夏會諸侯。自時厥後。膺圖甚衆。啓基創業。未有無功而得帝王者也。吾生自公宮。長于貴戚。牧州典郡。少年所爲。晏樂從容。懽娛事極。饑寒賤役。見而未經。險阻艱難。聞而不冒。在茲行也。並欲備嘗。如弗躬親。恐違天旨。爾等從吾。勿欲懈怠。今欲不言而治。故無所尤。庶愚者悅我寬容。智者慙而改過。世子及敦煌公請曰。經綸機務。一日萬端。取決英暮。四方輻湊。麾下驅馳。兒等承之。自餘常事。請付司存。巨細以聞。恐疲神思。又慮將佐等不被委任。頗以自疑。帝曰。是何言與。是何言與。華夷不附。爵賞不行。吾之責也。摧鋒蹈刃。斬將搴旗。爾之務也。深溝高壘。談笑從容。將吏之逸也。吾憂責爾。急於務逸樂。推下功名與之。賢自當內省。不賢。吾無所愧。然晉陽從我。可謂同心之人。俱非致命之士。漢初有蕭曹。而無爾輩。今我有爾輩。而無蕭曹。天道平分。乃復如是。行矣。自愛。吾知爾懷。自是以後。記室奉命。宣旨稱教。部伍問事。給付一物。軍書羽檄。賞罰科條。接撫初附。慰悅遠近。帝或口陳事緒。手疏意謂。發言折中。下筆當理。非奉進旨。所司莫能裁答。義旗之下。每日千有餘人。請賞論勳。告冤申屈。附文希旨。百計千端。來衆如雲。觀者如堵。帝處斷若流。嘗無疑滯。人人得所。咸盡歡心。皆嘆神明。謂爲天下主也。壬寅。遣通議大夫張綸等。率師經



略稽胡、離石、龍泉、文成等諸郡。丙辰，至于西河，引見民庶等，禮敬耆老，哀撫笑獨，賑貸窮困，擢任賢能，平章獄訟。日昃而罷，罔有所遺。顧謂左右曰：向之五條，惟皇要道，聰明文思，以之建極，孤所以自強不息，爲義兵之先聲也。仍自注授老人七十已上通議、朝請、朝散三大夫等官。教曰：乞言將智，事屬高年，耄耋杖鄉，禮宜優異。老人等年餘七十，匍匐壘壁，見我義旗，懽踰擊壤，筋力之禮，知不可爲，肉帛之資，慮其多闕，式加榮秩，以矚其養。節級並如前授。自外當土豪，以資除授，各有差。官之大小，並帝自手注，量才敍効，咸得厥宜。口問功能，筆不停輟。所司唯給告身而已。爾後遂爲恆式。帝特善書，工而且疾，真草不拘常體，而草跡韶媚可愛。嘗一日注授千許人官。更案遇得好紙，走筆若飛，食頃而訖。得官人等不敢取告符，乞寶神筆之跡，遂各分所授官名而去。乙丑，張綸等下離石郡。其太守楊子崇，爲亂兵所害，崇卽後主從弟也。頗有學識，性理帝甚惜之。崇性怯而無謨，故及於難。入自雀鼠谷，次于靈石縣。壬戌，霖雨甚，頓營於賈胡堡，去霍邑五十餘里。此縣西北抗汾水，東拒霍太山，守險之衝，是爲襟帶。西京留守代王遣驍將獸牙郎將宋老生率精兵二萬拒守。又遣左武侯大將軍屈突通將遼東兵及驍果等數萬餘人據河東，與老生相影響。仍命臨汾以東諸郡所在軍民城守，並隨便受老生、屈突等徵發。帝聞而笑曰：億兆離心，此何爲也。老生乳臭，未知師老之謀，屈突膽薄，嘗無曲突之慮。自防輕敵，二子有之。關外相時，俱非其事。且屈突嘗破玄感，時人謂其能兵。老生數勝羣盜，自許堪當勍敵，無識之徒，因相諂附，謂其必能制我，不遣援兵。我若緩以持之，彼必以吾爲怯，出其不意，不過一兩月間，並當擒之。吾無憂也。于時秋霖未止，道路泥

深帝乃命府佐沈叔安、崔善爲等，間遣羸兵往太原，更運一月糧，以待開霽。甲子，有白衣野老，自云霍太山，遣來詣帝，請謁。帝弘達至理，不語神怪，逮乎佛道，亦以致疑。未之深信，門人不敢以聞。此老乃伺帝行營，路左拜見。帝戲謂之曰：「神本不測，卿何得見？」卿非神類，豈共神言？野老對曰：「某事山祠，山中聞語，遣語大唐皇帝云：『若往霍邑，宜東南傍山取路。八月初雨止，我當爲帝破之。』可爲吾立祠廣也。」帝試遣案行，傍山向霍邑，道路雖峻，兵枉行而城中不見。若取大路，去縣十里，城上人卽遙見兵來。帝曰：「行逢滯雨，人多疲溼，甲仗非精，何可令人遠見？且欲用權譎，難爲之朽。」山神示吾此路，可謂指蹤。雨霽有徵，吾從神也。然此神不欺趙襄子，亦應無負於孤。」顧左右笑以爲樂。丙寅，突厥始畢使達官級失、特勤等先報，已遣兵馬上道。計日當至。帝曰：「前名賈胡，知胡將至，天其假吾此胡以成王業也。」己巳，滎陽賊帥李密遣使送款致書，請與帝合從。帝大悅，謂大郎、二郎等曰：「滎賊南柔，強胡北附，所憂此輩。今並歸心，主上志在過江，京都憂死不暇，天下可傳檄而定。何樂如之？」初，李密與楊玄感同逆，感誅而密亡命，投東郡賊帥翟讓。讓知密是蒲山公之子，頗讀漢書，納而禮之，推爲謀主。密以百姓饑弊，說來據洛口倉，屯守武牢之險。密自復舊封爲魏公，號翟讓爲司徒公，讓所部兵並齊濟間漁獵之手，善用長槍，華駒龍廐細馬，所向江都者，多爲讓所劫。故其兵銳於他賊，加以密是逃刑之人，同守衝要。隋主以李氏當王，又有桃李之歌，謂密應於符讖，故不敢西顧。尤加憚之。密雖爲讓所推，恐其圖己，恭儉自勵，布衣蔬食，所居之室積書而已。子女珍玩，一無所取。賑貸貧乏，敬禮賓客。故河汴間絕糧之士，多往依之。密又形儀眇小，讓弗之忌，遂謀殺讓，而并

其衆密以煬帝不來。翟讓已死。坐對敖倉。便有自矜之志。作書與帝。以天下爲己任。屢有大言。其書多不錄。大略云。欲帝爲盟津之會。殪商辛於牧野。執子嬰于咸陽。其旨以殺後主。執代王爲意。帝覽書抵掌。謂所親曰。密誇誕不達天命。適所以爲吾拒東都之兵。守成臯之阨。更覓韓彭。莫如用密。宜卑辭推獎。以騁其志。使其不虞於我。得入關。據蒲津而屯永豐。阻崤函而臨伊洛。東看羣賊。鷓蚌之勢。吾然後爲秦人之漁父矣。記室承旨報密書曰。頃者崑山火烈。海水羣飛。赤縣丘墟。黔黎塗炭。布衣戍卒。纒鋤棘矜。爭帝圖王。狐鳴蠶起。翼翼京洛。強弩圍城。臙臙周原。僵屍蒲路。主上南巡。泛膠舟而忘返。匈奴北熾。將被髮於伊川。輦上無虞。羣下結舌。大盜移國。莫之敢指。忽焉至此。自貽伊戚。七百年之基。窮於二世。周齊以往。書契以還。邦國淪胥。未有如斯之酷者也。則我高祖之業。幾墜於前。吾雖庸劣。幸承餘緒。出爲八使。入典八屯。位未爲高。足成非賤。素飡當世。俛俛叨榮。從容平勃之間。誰云不可。但顛而不扶。通賢所責。主憂臣辱。無義徒然。等袁公而流涕。極賈生之慟哭。所以仗旗投袂。大會義兵。綏撫河朔。和親蕃塞。共匡天下。志在尊隋。以弟見機而作。一日千里。雞鳴起舞。豹變先鞭。御宇當塗。聿來中土。兵臨郊郛。將觀周鼎。營屯敖倉。酷似漢王。前遣簡書。屈爲唇齒。今辱來旨。莫我肯顧。天生蒸民。必有司牧。當今爲牧。非子而誰。老夫年踰知命。願不及此。欣戴大弟。攀鱗附翼。惟冀早膺圖籙。以寧兆庶。宗盟之長。屬籍見容。復封于唐。斯足榮矣。殪商辛於牧野。所不忍言。執子嬰於咸陽。非敢聞命。汾晉左右。尙須安輯。盟津之會。未暇卜期。今日變輿。南幸。恐同永嘉之勢。願此中原。鞠爲茂草。興言感歎。實疚于懷。脫知動靜。遲數貽報。未面虛襟。用增勞軫。名

利之地。鋒鏑縱橫。深慎垂堂。勉茲鴻業。密得帝書。甚悅。示其部下曰。唐公見推。天下不足定也。遂注意東都。無心外略。劉文靜之使蕃也。來遲。而突厥兵馬未至。時有流言者。云突厥欲與武周南入乘虛。掩襲太原。帝集文武官人及大郎、二郎等。而謂之曰。以天贊我而言。應無此勢。以人事見機而發。無有不爲此行。遣吾當突厥武周之地。何有不來之理。諸公意謂何。議者以老生突厥相去不遙。李密譎誑。奸謀難測。突厥見利則行。武周事胡者也。太原一都之會。義兵家屬在焉。愚夫所慮。伏聽教旨。帝顧謂大郎、二郎等曰。爾輩如何。對曰。武周位極而志滿。突厥少信而貪利。外雖相附。內實相猜。突厥必欲遠離太原。寧肯近亡馬邑。武周悉其此勢。必未同謀。又朝廷既聞唐國舉兵。憂虞不暇。京都留守。特畏義旗。所以驍將精兵。鱗次在近。今若卻還。諸軍不知其故。更相恐動。必有變生。營之內外。皆爲勅敵。於是突厥、武周不謀同至。老生屈突。追奔競來。進闕圖南。退窮自北。還無所入。往無所之。畏溺先沉。近于斯矣。且今來禾菽被野。人馬無憂。坐足有糧。行卽得衆。李密戀于倉米。未遑遠略。老生輕躁。破之無疑。定業取威。在茲一決。諸人保家愛命。所謂言之者也。兒等捐軀力戰。可謂行之者也。耕織自有其人。請無他問。雨罷進軍。若不殺老生而取霍邑。兒等敢以死謝。帝喜曰。爾謀得之。吾其決矣。三占從二。何籍輿言。懦夫之徒。幾敗乃公事耳。丙子。太原運糧人等至。八月己卯。霖止。帝指霍太山而言曰。此神之語。信而有徵。封內名山。禮許諸侯有事。乃命所部鄉人設祠致祭焉。庚辰。命諸軍曝行裝。整鎧仗。辛巳。且發引。取傍山道而趨霍邑。七十餘里。初行。霧甚。俄而秋景澄明。帝謂大郎、二郎曰。今日之行。在卿兩將。景色如此。天似爲人。唯恐老生怯而不戰。閉

門城守。其若之何。大郎、二郎啓帝曰。老生出自寒微。勇而無智。討捕小盜。頗有聲名。今來居此。必當大蒙賞勞。若不出戰。死在不疑。輕騎挑之。無憂不出。如其固守。便可誣其相引。謬爲誠節。彼無識解。不知遠大。爲其左右。體悉凡庸。羣小相猜。自成疑阻。無妨密相表奏。不廢傳首京都。小慧之人。思此解事。以此量之。來戰不惑。帝曰。老生不能逆戰。賈胡吾知無能爲也。爾等籌之。妙盡其實。是日未時。帝將麾下左右輕騎數百。先到霍邑城東。去五六里。以待步兵至。方欲下營。且遣大郎、二郎各將數十騎逼其城。行視戰地。帝分所將人爲十數隊。巡其城東南。而向西南。往往指麾。似若安營而攻城者。仍遣殷開山急追馬步等後軍。老生在城上。遙見後軍欲來。真謂逼其城置營。乃從南門、東門兩道。引兵而出。衆將三萬許人。帝慮其背城不肯遠鬪。乃部勒所將騎兵馬左右軍。大郎領左軍。擬屯其東門。二郎將右軍。擬斷其南門之路。仍命小縮。僞若避之。既而老生見帝兵卻。謂爲畏己。果引兵更前。去城里餘而陣。殷開山等所追步兵。前軍統到。方陣以當老生。中軍後軍。相續而至。未及戰。帝命大郎、二郎。依前部分馳而向門。義兵齊呼而前。紅塵暗合。鼓未及動。鋒刃已交。響若山崩。城樓皆振。帝乃傳言。已斬宋老生。所部衆聞而大亂。捨仗而走。爭奔所出之門。門已大郎、二郎先所屯守。懸門不發。老生取入不得。城上人下。繩引之。老生攀繩欲上。去地丈餘。軍頭盧君諤所部人等。跳躍及而斬之。傳首詣帝。於是兵隨所向奮擊。禁不可止。數里之間。血流蔽地。僵屍相枕。日欲將落。帝見戰士心銳。仍命登城。時無攻具。肉薄而上。自申至酉。遂平霍邑。帝視戰地。愴然謂左右曰。河東已來。孤之所使。百姓見義旗。有誠節。老生所逼。至于塗炭。亂兵之下。善惡不分。火燒崑



山。誰論玉石。無妨死人之內。大有赤心於我者也。取來不得。及此戰亡。生未被知。沒有餘恨。靜而思之。良深痛惜。從今已去。當以文德來之。不復用兵戈矣。其破霍邑。攻戰人等有勳者。並依格賞。受事不踰日。惟有徒隸一色。勳司疑請。教曰。義兵取人。山藏海納。逮乎徒隸。亦無棄者。及著勳績。所司致疑。覽其所請。可爲太息。豈有矢石之間。不辯貴賤。庸勳之次。便有等差。以此論功。將何以勸。踰而爲王。亦何妨也。賞宜從重。吾其與之。諸部曲及徒隸征戰有功勳者。並從本色勳授。壬午。帝引霍邑城內老生文武長幼。見而勞之曰。老生之外。孤無所咎。縱卿不誠于孤。亦當以赤心相仰。乃節級授官。與元從人齊等。其丁壯勝兵者。卽遣從軍。配左右領軍大都督。還取其同色同黨自相統。處之不爲疑異。俘降之徒。不勝喜躍。欣若再生。其有關中人欲還者。卽授五品散官放還。內外咸悅。咸思報効。仍命葬宋老生以本官之禮。自是以後。未歸附者。無問鄉村堡塢。賢愚貴賤。咸遣書招慰之。無有不至。其來詣軍者。帝並節級授朝散大夫以上官。至于逸民道士。亦請效力。教曰。義旗撥亂。庶品來蘇。類聚羣分。無思不至。乃有出自青溪。遠辭丹竈。就人間而齊物。從戎馬以同塵。咸願解巾。負茲羈鞅。雖欲勿用。重違其請。逸民道士等。誠有可嘉。並依前授。人或以授官。太高諫帝者。帝曰。不悛爵賞。漢氏以興。比屋可封。唐之盛德。吾方稽古。敢不遵行。天下之利。義無獨饗。率土皆貴于我。豈不益尊乎。且皇隋敗壞。各歸於此。鴈門解圍之効。東都援臺之勳。在難卽許。授大夫。免禍則惟加小尉。所以士無鬪志。將有墮心。版蕩分崩。至于今日。覆車明鑒。誰敢効尤。然亦使外寇覬覦之徒。嘗授無過此也。又加官慰撫。何如用兵殺戮。好生任賞。吾覺其優。當以不日而定天下。非卿等

小見所及。丙戌。入臨汾郡。勞撫。任用郡內官民。一如霍邑。庚寅。宿于絳郡西北之鼓山。此山。帝爲討捕大。使時。舊停營所。故逗而宿焉。去絳十餘里。絳城不下。是日曉。鼓山西北有大浮雲。色或紫或赤。似華蓋樓。闕之形。須臾。有暴風吹來向營。而臨帝所居帳上。帝指絳城而謂傍侍曰。風雲如此。見從。彼何不達之甚。仍命廚人。明日下城而後進食。辛卯。帝觀兵于絳城。將士等爭欲先登。因而縱上。自卯及巳。遂取之。而食于正平縣。令李安遠之宅。通守陳叔達已下。面縛請罪。並捨而不問。待之如初。餘依臨汾郡部分。癸巳。至于龍門縣。劉文靜。康鞘利等來自北蕃。突厥五百人。馬二千疋。從鞘利等至。帝喜其兵少而來遲。藉之以關隴。謂劉文靜曰。吾已及河。突厥始至。馬多人少。甚愜本懷。先是帝使時。于此縣界見河水清。皇太子又于此界獲玄狐。於往縣西南。宴見鞘利。并與縣內道俗等。敍舊極懽。丙申。至汾陰。遣書招馮翊賊帥孫華。華所部強兵。至餘數千。積年劫掠。非常富實。灤水以北。莫敢當之。帝書到。華喜而從命。己亥。進營。停于壺口。分遣諸軍。問津水濱之人。具舟爭進。日有數百。仍署水軍焉。辛丑。太原獲青石龜形。文有丹書四字。曰。李治萬世。齊王遣使獻之。翠石丹文。天然映徹。上方下銳。宛若龜形。神工器物。見者咸驚奇異。帝初弗之信也。乃令水漬磨以驗之。所司浸而經宿。久磨。其字愈更鮮明。於是內外畢賀。帝曰。上天明命。既以萬吉。恭承休祉。須安萬分。孤以寡德。寧堪預此。既爲人下。不容以之頒告。宜以少牢祀石龜。而爵送龜人。用彰休慶。是日。又有獲嘉禾而獻者。教曰。嘉禾爲瑞。聞諸往策。逮乎唐氏。世有茲祥。放助獲之於前。叔虞得之於後。孤今糺合。復逢靈貺。出自興平。來因善樂。休徵偉兆。何其美與。顧循虛薄。未堪當此。呈形之處。須表

天休。送嘉禾人興平孔善樂。宜授朝散大夫。以旌嘉應。壬寅。孫華率其腹心輕騎數十。至自郟陽。華年餘弱冠。言容質直。帝見而輕之。華每殷勤誠款。請先立効。帝乃厚加撫遇。甚得其情。謂華曰。卿能渡河遠來相見。吾當貴卿。不減鄧仲華也。關中卿輩不少。名並劣卿。卿今率先從我。羣雄當相繼而至。於是拜華左光祿大夫。封武鄉縣公。加馮翊郡守。從其來者。仍委華以次授官。頒賜各有差。仍命華先濟。爲西道主人。華大悅而去。仍命左右統軍王長諧。劉弘基。并左領軍大都督府長史陳演壽等。率師次華而渡。據河西岸。以待大兵。九月乙卯。張綸自離石道下龍泉。文城等郡。獲文城太守辛公鄭元璿。送焉。帝見元璿。釋而遣之。初。王長諧。劉弘基。陳演壽之濟河也。帝誡之曰。屈突通今在河東。精兵不少。相去五十餘里。而不敢來。足驗人情不爲之用。然通雖不武。久在戎行。守法懼罪。終無坐位。不妨伺便時相邀襲。宜爲之備。以折要衝。通若不入關。河東自然歸我。分兵向彼。我卽擊其河東。通若全兵守城。卿其絕其橋道。可謂前扼其喉。後撫其背。首尾相救。非通所堪。若不走之。必成擒矣。吾且按兵觀其進退。至是通聞孫華導長諧等渡河。果遣獸牙郎將桑顯和。率驍果精騎數千人。夜馳掩襲長諧等軍營。諧及孫華等奉教備預。故並覺之。伺和赴營。設伏分擊。應時摧散。追奔至于飲馬泉。斬首獲生。略以千計。顯和走入河東城。僅以身免。仍撤斷蒲津橋。帝聞而謂官屬曰。屈突遣兵此行。事不獲已。今若進逼圍之。必不敢出。使劉弘基。孫華等至關門。斷其行路。然後吾於壺口朝服濟河。利涉大川。斯之謂矣。戊午。帝親率諸軍圍河東郡。分遣大郎。二郎。長史裴寂。勸兵各守一面。帝登城東原上。西望城內所爲。屈突果不敢出兵。閉門自守。城高甚峻。不易可

攻。帝觀義士等志。試遣登之。南面千餘人。應時而上。時值雨甚。帝命旋師。軍人既得上城。遂不時速下。帝曰。屈突宿衛舊人。解安陣隊。野戰非其所長。嬰城善爲捍禦。我師常勝。人必輕之。驍銳先登。恐無還路。今且示威而已。未是攻城之時。殺人得城。如何可用。乃還。命諸將移營河渚。文武將佐等已下。定河北。衆餘十數萬。今欲入關。請兼置公府。觀領太尉。增選僚屬。帝曰。兵臨蒲坂。諸君欲以舜職見推。此意可知。未煩如此。必爲僚屬增府。任從便宜加置。於是復領太尉。丙辰。馮翊太守蕭造。率官屬舉郡歸義。相繼有華陰。縣令李孝常。據永豐倉。遣子弟妹夫寶軌等送款。仍便應接河西關上兵馬。又京兆萬年。醴泉等諸縣。皆遣使至。帝曰。吾未濟者。正須此耳。今既事辦。可以濟乎。乃命所司以少牢祀河。庚申。率諸軍以次而渡。甲子。舍于朝邑。長春宮。三秦士庶。衣冠子弟。郡縣長吏。豪族弟兄老幼。相攜來者如市。帝皆引見。親勞問。仍節級授官。教曰。義旗濟河。關中響應。轅門輻湊。赴者如歸。五陵豪傑。三輔冠蓋。公卿將相之緒餘。俠少良家之子弟。從吾投刺。咸畏後時。扼腕連驥。爭求立效。靡之好爵。以永今朝。於是秦人大悅。更相語曰。眞吾主也。來何晚哉。咸願前驅。以死自効。丙寅。遣世子隴西公將司馬劉文靜。統軍王長諧。姜寶誼。寶琮。諸軍數萬人。屯永豐倉。守潼關。備他盜。慰撫使人寶軌等受節度焉。遣燉煌公率統軍劉弘基。長孫順德。楊毛等諸軍數萬人。往高陵道。定涇陽。雲陽。武功。整屋。鄠諸縣等。慰撫使人掾殷開山等受節度焉。先是。帝從弟趙興公神通起兵鄠縣。有衆數千。聞義旗渡河。遣使迎帝。又賊帥李仲文遣兄仲威送款。仲文。則魏密之從父也。以密反於滎陽。緣坐亡命。招集無賴。抄劫郿縣之間。衆將四五千。整屋賊帥何潘兒。向善志等。

亦各率衆數千歸附。宜君賊帥劉旻，又率其黨數千人降。帝並以不次封，遣書勞之，仍令各於當界率衆，便受燉煌公部署。旬日間，京兆諸賊四面而至，相繼歸義。罔有所遺，商農工賈各安其業。京城留守代王，及尙書衛文昇、將軍陰世師、京兆丞骨儀等，以帝威德遐振，民願所從，恐京邑之人一旦去盡，乃閉門拒守。運糧入宮，帝聞而歎曰：「吾旣平戎於王，翼尊隋室，欲立孺子，以報高皇，今被見疑，拒不相納，方知邵爽不悅於周旦，非徒言耳。」陰衛羣小負我之深，己巳帝之蒲津，觀河東城。庚午，南過永豐倉，是夜宿於臨晉。灤渭合流之處，將渡渭津，人以見船朽破不堪，帝渡及於灤水上，流數十里，更取好舡，苦於水淺，沙磧相次，舡行不進，憂怖不知所爲。其夜三更，天甚晴霽，忽然覺水暴長數尺，逆流而上，船泛深波，得達津次。及明，帝登船欲渡，乃見逆流不已，津可以聞，衆咸駭異，以爲光武滹沱之冰，無以異此。並於舟中拜賀。帝曰：「此偶然耳，吾何德以堪之。」乃命所司以少牢祀灤渭，并有事於華山。帝至倉所，勞軍，見箱廩填實，銘題數多，喜謂從者曰：「千里遠來，急於此耳。」此旣入手，餘復何論。食之與兵，今時且足，信出于己。久行諸將，俱謹備守，無爲他慮。未下馬，仍開倉大賑饑民。辛未，還宮。壬申，進屯馮翊郡，過舊宅，饗告五廟，禮也。初，周齊戰爭之始，周太祖數往同州，侍從達官，隨便各給田宅。景皇帝與隋太祖並家於州治，隋太祖宅在州城東南，西臨大路。景皇帝宅居州城西北，而面灤水，東西相望，二里之間。數十年中，兩宅俱出受命之主，相繼代興，時人所見，開闢已來，未之有也。乙亥，燉煌公至盩厔，所過諸縣及諸賊界，莫不風馳草靡，裹糧卷甲，唯命是從。遣使啓帝，請期日赴京。帝曰：「屈突東行，不可西歸，無路觀吾成敗，方有所之，不可爲虞矣。」乃命

隴西公最簡倉上精兵。自新豐道。越長樂離宮。令燉煌公率新附諸軍。自鄠縣道屯長安故城。至並各聽教。迨上郡。雖陰以北。咸遣使歸款。丙子。大軍西引。歷下邳。過櫟陽。路左所有煬帝行宮園苑。及宮人等。並罷之。教曰。大業已來。巡幸過度。宿止之處。好依山水。經茲勝地。每起離宮。峻宇雕牆。亟成壯麗。良家子女。充仞其間。怨曠感于幽明。糜費極於民產。替否迭進。將何糺湜。馳道所有宮室。悉宜罷之。其宮人等。並放還親屬。冬十月辛巳。帝至灊上。仍進營。停于大興城春明門之西北。與隴西燉煌等二公諸軍二十餘萬。衆會焉。帝勒諸軍各依壘壁。勿入村居。無爲侵暴。若無兵者。恭以俟命。代王與留守衛文昇。陰世卿等。以義兵多而且肅。不令而齊。門防轉嚴。拒守愈固。信使不通。告諭事絕。帝雖每遣使至城下。申以尊隋夾輔之意。愚人俗吏。不達變通。關于事機。往而無報。如此。向經旬日。諸將相率啓帝曰。京城不啓。此是隋運其亡。天旣亡之。非人能復。違天棄日。勞師費糧。坐守愚夫。恐非長策。請進圍之。以觀其意。帝曰。兵纏象魏。矢及黃屋。人其謂我何哉。諸將對曰。無成王之主。不得行周公之事。又恐巨猾之徒。知義兵已定。關中來爭形勝。請更思之。帝乃逡巡。未有報。京兆舊賊帥等。並以家近帝城。不預元從。恥無功。乃各率所部兵。分地逼城而上。帝慮其輕脫失利。辛卯。命二公各將所統兵。往爲之援。京城東面南面。隴西公主之。西面北面。燉煌公主之。城中見而失色。更無他計。惟冀屈突及東都救援而已。甲午。關中羣帥等各請率驍銳登城。二公莫之能止。時帝在春明門外。聞而馳入。舍於羅郭安興坊。以鎮之。甲辰。諸軍各競造攻具。以臨城。帝又未之許。二公及文武所司等固請曰。太原以來。所過未嘗經宿。長驅四塞。罕有不克之城。今至京師。不

時早定。玩敵致寇。以挫兵鋒。又慮初附之人。私輕太原之兵。無能爲也。此機不小。請速部分。帝曰。弘弩長戟。吾豈不許用之。所冀內外共知。以安天下。斯志不果。此外任諸公從民所欲。然七廟及代王并宗室支戚。不得有一驚犯。乃下教。有違此者。罪及三族。於是諸軍各于所部營分角。脩攻戰之具。雲梯競聳。樓櫓爭高。百道齊來。千里並進。繞京竹木。殲于斯矣。十一日丙辰昧爽。咸自逼城。帝聞而馳往。欲止之。而弗及。纔至景風門東面。軍頭雷永吉等。已先登而入。守城之人分崩。帝乃遣二公率所統兵。依城外部分。封府庫。收圖籍。禁擄掠。軍人勿雜。勿相驚恐。太倉之外。他無所于。吏民安堵。一如漢初入關故事。代王先在東宮。乃奉迎。居於大興後殿。是日。帝還。移營舍於長樂宮澹川上。先是。隋主以梟滅作逆。掘其墳壘。而洿其室。陰世師。骨儀等。遂以爲恆准。乃令京兆郡訪帝之五廟塋域所在。並發掘焉。帝以此憾之。言必流涕。戊午。收陰世師。骨儀。崔毗伽。李仁政等。並命隴西公斬於朱雀街道。以不從義而又復焉。餘無所問。京邑士女。僮娛道路。華夷觀聽。相顧欣欣。乃命太常促擇吉日。告高廟。定尊位。立代王之禮。文武將佐等議。請曰。天厭隋德。曆數在唐。謳歌在路。被于遐邇。兵起晉陽。遠定秦雍。百餘日間。廓清帝宅。神武之速。此謂若飛。非天啓聖。孰能如是。昔漢高入關。不卽自王。項羽後至。悔無所及。公雖卑以自牧。須安天下。僉議請依符讖。上尊號。帝愀然改容曰。舉兵之始。本爲社稷。社稷有主。孤何敢二。劉季不立。子嬰所以屈於項羽。孤今尊奉世嫡。復何憂哉。壬戌。乃率百僚。備羽儀法物。具法駕。迎代王卽位於□□□□□□□□十餘歲矣。大赦天下。改大業十二年爲義寧元年。復天下勿出今年租賦。賜民子孫承後者爵一級。是日。仍遙尊後主。

爲太上皇。以少帝在。不言廢也。



# 大唐創業起居注卷二

起攝政至卽眞日凡一百八十三日

義寧元年冬十一月甲子。少帝以帝爲丞相。進封唐王。位在王公上。以武德殿爲丞相府。改教稱令。萬機百度。禮樂征伐。兵馬糧仗。庶績羣官。並責成於相府。惟郊祀天地。四時禘祫。奏聞。帝固辭不拜。公卿將佐等請曰。公負孺子當朝。豈得辭乎。攝政公不入相。王室何依。臨茲大節。義無小讓。帝嘆曰。王家失鹿。遂使狐同老狼。乃奉詔受冊。乙丑。榆林、靈武、五原、平原、安定諸郡。並舉城降。並遣使詣義軍請命。於是遣書發使。慰喻巴蜀。丙寅。置丞相府長史。已下屬官。還以大將軍府僚裴寂等依次爲之。己卯。以隴西公爲唐王世子。改封燉煌公爲秦國公。四郎元吉爲齊國公。仍改太原留守爲鎮北府。總統山東諸郡。十二月。隴西金城郡奴賊薛舉等。破賊率唐弼于扶風。自稱天子。初。弼遣使詣帝歸款。投狀扶風郡。而爲薛舉所圍。帝遣援兵往扶風。未至。弼黨在郡城外爲舉所圖。弼遂被郡守竇璡所殺。俄而璡及河池郡守蕭瑀。相繼歸京師。於是拜璡爲戶部尙書。上柱國。封燕國公。瑀拜禮部尙書。封宋公。是月也。屈突通自潼關都尉府欲奔東都。關上劉文靜等諸軍追而獲焉。送之相府。帝見通。捨而禮之。謂曰。公以清貞奉上。臣道不虧。孤所翹心。惟恨得卿之晚。通拜款。劉文靜等仍定弘農郡。及佐諸縣。義寧二年春正月。蜀漢及氐羌所在諸郡。雄豪并守長等奉帝書。感悅。競遣子弟獻款。絡繹而至。所司報答。日有百餘。梁益之間。宴如也。承詔封丞

相長史裴寂爲魏國公。司馬劉文靜爲魯國公。趙興公神通爲鄭國公。永安公孝基爲蜀國公。自餘將佐殷開山、劉弘基已下，並以次封開國郡公、縣公焉。其日，令曰：李密趨起鞏洛，自許當塗，王城如燬，憂心孔棘，東都危逼，有若倒懸。西人之子，理本奔命，其左右大都督府所統諸軍，並宜誠嚴，以時式遏。有征無戰，是謂義師，招諭不從，勿難還也。初年孟月，春作方輿，不奪農時，宜知其速。於是以世子爲左元帥，秦王爲右元帥，左右二府諸軍十餘萬衆，引于澆水之北，仍以尙書蕭瑀爲相府司馬，劉文靜爲左元帥，府長史尙書竇璡爲掾，殷開山爲右元帥，府長史司馬，又拜屈突通爲上柱國，封蔣國公，檢校行軍左右虞候事。軍士以下僚佐等，皆選知名者爲之。帝親詣軍，勞而誓遣之。二月，涿郡太守口藝與漁陽、上谷、北平、柳城等郡諸官民，遣使送款。先是平原賊竇建德聚衆數萬人，充斥河右，渤海、高陽等郡。大將軍府使人張道源所定趙郡、襄國、武安、清河等郡，是並陷於賊。道源亦隨而沒焉。建德遂僭稱王，自號夏國。又南陽朱祭衆有所望，並好食人，自稱可達汗，莫知可達汗之名，有何義理，酷害異常。又有賊蕭銑起兵於江陵，於是華陽公鄭元璿爲太常卿，封沛國公，遣將兵出商山上洛道，定南陽以東諸郡，並遣使人左領軍大都督府司兵馬元規，慰撫安陸及荆襄間。三月，左右二元帥軍招諭東都城門不啟，李密又不敢西寇。時暹農月，遂奉令旋師宜陽、新安二郡而還，留行軍總管史萬寶、盛彥師、鎮宜陽呂紹、宗任懷、鎮新安少帝以帝功德日懋，天曆有歸，欲行禪讓之禮，乃進帝爲相國，加九錫，賜殊物，加殊禮焉。冊曰：於戲，維爾假黃鉞，使持節大都督內外諸軍事，錄尙書大丞相，新除相國總百揆，唐王夫乾道貞觀四象所以運行，坤德含

弘萬有馮其載育。是以天地交泰。資始由乎聖人。陰陽順成。總已歸其元輔。故能陶甄品物。代彼天工。息四海之羣飛。迴三靈之掩耀。百揆時序。五典克從。雖伊尹格于皇天。周公光于四表。方斯蔑如也。今將受王典冊。其敬聽朕命。上天不造。降禍于我國家。高祖棄盛業而昇龍。太上釋寶圖以委御。王室如燬。喪亂弘多。數屬道消。時鍾代季。郊廟絕主。有若綴旒。則我祖宗之業。已墜于地矣。王應休明之運。從兆人之欲。奉七璽於代邸。飛六轡於周京。此乃綱我絕維。有大造於皇家者也。曩者塞表省方。羣胡反噬。矢流君側。圍甚平城。淪陷指期。阡危莫恤。王釋位同謀。總伐千里。晨炊蓐食。倍道兼行。匈奴遠跡。乘輿反正。此則王之功也。歷山飛稱。兵燕趙。妄假名號。河朔響應。山西屯結。王首啓戎行。大殲醜類。此又王之功也。夷狄貪婪。屬犯關塞。驅迫良善。殺略吏人。王鞠旅理兵。卷甲長駕。追奔逐北。掃地無遺。此又王之功也。王威徒黨。潛謀逆亂。外交邊裔。內騁奸回。實繁有徒。傾覆宗社。王收戮兇渠。罪人斯得。此又王之功也。四郊多壘。三輔倒懸。黃巾示宮闕之名。赤眉爲園陵之禍。凶荒仍歲。荆棘旅庭。王投袂義舉。星言電邁。取霍邑如摧枯。舉秦關如反掌。克清河渭。志存匡復。此又王之功也。北荒獯鬻。事藉騎靡。比者中原多故。龍堆道絕。王式遏有方。款關請吏。更敦鄰睦。復我舊藩。此又王之功也。汾晉地險。逋逃攸聚。山藏川量。負罪稽誅。類馬騰之乞活。同嚴尤之盡赦。王懷柔伏叛。杖信示威。交臂屈膝。申其向化。此又王之功也。河潼轉漕。密邇關畿。京坻委積。由來尙矣。羣凶據竊。一鼓而崩。此又王之功也。京師危迫。奸臣放命。異一相之居內。同四凶之扇禍。王大誓師旅。興言感慨。蕩清上國。拯厥贅旒。暴市焚屍。並梟元惡。此又王之功也。上天貽愛。莫甚乎

人爰祚聖哲。弼予冲幼。官守司存。社稷有奉。濟方割于下墊。燦員光於上參。此又王之功也。唐弼凶豎。草竊岐陽。吞噬舊邦。侵逼都鄙。王制以御策。觀其攜二親。離衆叛。我盡收之。此又王之功也。華陽黑水。控接岷嶓。山川阻深。盡爲逋藪。義風所靡。化行江漢。此又王之功也。薛舉崇姦。同惡相濟。僭擬輿服。滔天泯夏。西土遊魂。秦山肆毒。赫斯授律。咸俘醜類。岐隴齊築。京觀汧渭。爲之不流。此又王之功也。三蜀奧區。一都之會。夷民紛雜。蠻陬荒梗。王發一介之使。降咫尺之書。而靈關洞開。劍閣無險。此又王之功也。弘農甸服。襟帶河陝。鞠爲寇場。連城阻亂。長策遠振。不征而服。此又王之功也。王有濟天下之勳。重之以明德。爰初發跡。肇自鴻階。峻極比于嵩華。清瀾運于溟渤。體茲將聖。道被如仁。在物不失其宜。含靈咸安其所。春生夏長。信及四時。地平天成。義兼得一。總萬機之務。因百姓之心。保我皇家。弘濟乎多難者也。是以濟濟多士。庶政緝熙。穆穆四時。要荒式序。激清風以厲俗。暢和氣以調時。神功侔於造化。積德高於垂象。朕又聞之。先王之宰物也。尊賢尙德。茂賞疇庸。五侯專征。九命作伯。周襄光錫。桓文是膺。大啓南陽。以表東海。况乃道冠伊稷。功高晉鄭。酬勳蔑爾。朕甚懼焉。今晉授相國。以河內、汲郡、清河、武安、魏郡、信都、高陽、平原、趙郡、襄國、通前三十郡。增封唐國。錫茲黑土。苴以白茅。爰定爾邦。用建冢社。昔周邵分陝。咸爲保傅。毛畢諸侯。入作卿士。內外之任。禮實攸宜。今授相國印綬。唐王璽絨。茅土金獸符第一。至第五。竹使符第一。至第十。相國禮絕羣后。任總所司。朝班彝數。宜以事革。其以相國總百揆。去錄尙書之號。上所假黃鉞。內外都督丞相印綬。又加王九錫。其敬聽後命。以王繩紀禮度。哀矜折獄。罔不用情。無或遷志。是用錫王大輅。

戎輅各一。玄牡二駟。以王分地。敦本人。天是賴。疏爵務農。所實惟穀。是用錫王袞冕之服。赤鳥副焉。以王風雅所被。獮戎咸格。陰陽順理。遐邇宅心。是用錫王軒懸之樂。六佾之舞。以王翼宣。阜道。義聲遐暢。三才所運。四海攸歸。是用錫王朱戶以居。以王登賢命秩。哀德升朝。思帝所難。能官流詠。是用錫王納陛。以登以王正色持衡。鎔範御下。式遏姦宄。蕩清華夏。是用錫王武賁之士三百人。以王威同夏日。志厲秋霜。刑厝有期。寬而不漏。是用錫王鈇鉞各一。彤弓一。彤矢百。旅弓十。旅矢千。以王霜露履踐。禮祀恭嚴。天地幽通。孝思至感。是用錫王秬鬯一。道珪瓊副焉。唐國宜置丞相。已下一遵舊式。往欽哉。祇奉大禮。用膺多福。以光我高祖之休命。可不慎歟。侍中陳叔達之詞也。帝私謂元從府僚曰。少帝今時。可謂吾家所立。本謂社稷。上報高祖。冀終隋氏。不失人臣。豈期孺子尙幼。未復明辟。僥倖之徒。諷其假孤名器。安有至尊羽儀。天子之禮。假諸臣下。何以爲國。孤總朝政。此事不得不知。政由己出。還自錫進。貪天之功。以爲己力。孤不欺人。敢欺天也。羣僚等固請曰。蕭何爲相國。魯公用王禮。前賢不讓。請以爲不疑。帝曰。兩賢遇周漢之初興。有大勳于二代。孤屬亂離之季世。值隋運之將盡。昏明時異。授受事殊。擬於其倫。實多慙德。然諸公欲孤行魏晉之故事。爲豹變之鴻漸。聊爲吾子揚摧而陳之。曹馬之興。不以義舉。英雄鼎峙。角逐爭衡。無君之人。欲速大位。逼脅孤寡。假詔自媒。因九錫而論功。矜百辟於殊禮。示難進於謙退。思厭塞於羣情。故路人咸見其心。有識呼爲狐媚。斯皆兆庶不推。謳歌不屬者也。宋齊葢爾。處於江湖。地當漢之一郡。自稱尊號。可知必以魏晉爲模楷。習虞夏而禪讓。功微五伯。禮盛二王。於是阿諛希旨之儔。申敦勸于抗矯。飾非輕薄之子。

聘讓辭而偉畢。未聞桀紂之胤。禪於殷周之初。從此而言。斷可知矣。何輕易天命。以自厚誣。孤每觀前史。見斯事迹。未嘗不拊掌而笑。嗤彼羣迷。明賢所棄。見賢思齊。勿循前弊。時有啓帝者。以爲卽眞之漸。舊事因循。相承作故。帝曰。孤聞昇天無階。於何爲漸。必如來旨。事轉成疑。至若河濱仄陋。泗上亭長。令其位次受終。未易享國。所問功德何如。誰云位之大小。以孤堪守關中。能負孺子。見推相國。作鎮假王。漢有前蹤。不能違衆。欲以曹操。司馬炎爲例。九錫殊物。賜加非宜。不願擬議。亦恥老瞞同傳。公卿聞帝此旨。寤而厚顏。詣府陳謝。帝又謂之曰。魏氏以來。革命不少。鴻儒碩學。世有名臣。佐命興皇。皆行禪代。不量功業之本。惟存揖讓之容。上下相蒙。遂爲故實。寧有湯武接于夏殷。不憲章于堯舜。晉魏隔於周漢。翻祖述于助華。且堯之禪舜。二聖繼踵。舜因讓禹。以明堯哲。示天下爲至公。不私己於尊位。故賓虞以後。若脫屣焉。是知非堯不能讓舜。非舜不能命禹。商周德所不逮。有撥亂反正之功。順天行誅。逆取順守。咸以至誠兼濟。無隱神祇。三五帝王。稱茲四聖。英聲茂實。飛騰萬古。堯舜不及於子。讓德而稱帝。湯武不私於後胤。力取而爲王。故道有降差。名有優劣。然立功立德。亦各一時。末葉後來。功德無紀。時逢屯否。擁兵竊命。託云輔政。擇立餘孽。頑嚚支庶。先被推崇。容哲英宗。密加夷戮。專權任己。逼令讓位。雖欲己同於舜。不覺禪者非堯。貶德於唐虞。見過于湯武。豈不悖哉。魏晉宋齊。爲惑已甚。託言之士。須知得失。羣公退而悅脫。私相謂曰。相王格論。絕後光前。發明典謨。申理誓誥。可謂君子一言。定八代之榮辱矣。帝又謂所親曰。諸人雖復見吾言論。仍自不知至理。吾今一匡天下。三分有二。入關形勢。頗似漢高祖。且起軍甲子。旗幟已革。如何更

於少帝之處。却受九錫而求殊禮。孺子有知。不容肯行此事。既成無識。此乃吾自爲之。立身以來。不欺暗室。如何今日。誣罔天聽。所區別帝王。激揚名理。以懲是古。非今之輩。謬相勸逼。於是惟改丞相府爲相府。而九錫殊禮。並屬諸有司。是月也。宇文文化及兼弟智及等。并驍果武賁司馬龔。監門郎將裴乾通等。謀同逆。因驍果等欲還精銳。遂夜率之而圍江都宮。殺後主於彭城閣。初。驍果兵等苦於久在江都。咸思歸叛。至是。煬帝知唐據有西京。過江計定。仍先分驍果往守會稽。誑之云。往東吳催米。故化及等因之而作難。於是隋主崩問至。帝乃率文武羣賢僚佐。從少帝舉哀於大興後殿。帝哭哀甚。有諫止帝者。帝曰。吾爲人下喪居。何可不哀。然亦恨後主不亡於開皇之末。以延鼎祚耳。化及等本自因思歸之衆而行殺逆。及以許公之子爲衆所推。至是。遂僭稱尊號。率其同惡欲入關。以李密斷成臯。據洛口。乃圖北取黎陽倉。從白馬津而渡。帝乃遣統軍張倫。將蒲津以東從兵。往魏郡道。招慰化及等。繼遣淮安王神通。往定山東諸郡。又募犯罪者數千人。聽効力贖罪。并張倫等。並是淮安王節度焉。李密聞化及之趣河北。乃分兵遣別將徐世勣等屯黎陽。拒守。化及從宛道渡河。絕糧。遂頓於聊城縣。淮安王等率衆圍城。部分失機。行兵不利。退保魏郡。化及衆聚聊城。糧無所出。竇建德知其窮蹙。遂攻破之。獲化及兼弟智及。責以弑逆。並斬之。而狗衆煬帝蕭皇后亦沒于賊庭。於是江都宮人美女珍寶金帛。及乎玉璽。並建德有之。不逞之徒。因說建德送蕭皇后及宮人等。多贖金帛。重賂突厥。市馬而求援。少帝年未勝衣。不經師傅。長於婦人之手。時事茫然。既知煬帝不存。惟求潛遜。夏四月。詔曰。天禍隋國。大行太上皇遇盜江都。酷甚望夷。覺深驪北。憫

予小子。奄紹丕愆。哀號永感。五情糜潰。仰惟荼毒。仇復靡申。形影相吊。罔知啓處。相國唐王。膺期命世。扶危拯溺。自北徂南。東征西伐。總九合于一匡。決百勝于千里。紮率夷夏。大庇氓黎。保乂朕躬。繫王是賴。德侔造化。功格蒼旻。兆庶歸心。曆數斯在。屈爲人臣。載違天命。昔在虞夏。揖讓相推。苟非重華。誰堪命禹。當今九服崩離。三靈改卜。大運去矣。請避賢路。兆謀布德。願已莫能。私僮命駕。須歸藩國。予本代王。及予而代。天之所廢。豈其如是。庶憑稽古之聖。以誅四凶。幸值惟新之恩。預充三恪。雪恥怨於皇祖。守禮祀爲孝孫。朝聞夕殞。及泉無恨。今遵故事。遜於舊邸。庶官羣后。改事唐朝。宜依前典。趣上尊號。若釋重負。感泰兼懷。假手真人。俾除醜逆。濟濟多士。明知朕意。仍勅有司。凡是表奏。皆不得以聞。章表不通。理難再請。欲召公卿議之。漸以啓諭。於是文武將佐。裴寂等二千人。不謀同辭。並不肯奏詔。乃相率上疏勸進曰。臣聞天下至公。非一姓之獨有。聖人達節。與萬物而推移。故五運遞興。百王更王。春蘭秋菊。無絕終古。玉疏石記。筆舌紛綸。垂統有光。煥乎寶籙。伏惟陛下。資靈種德。稟慶至真。固縱惟神。生知乃聖。量包乎宇宙。智周乎品物。羣生塗炭。躋之仁壽。逢百六之厄。創業雲雷。追三五之蹤。財成天地。仲夏之半。龍躍晉陽。孟冬伊始。鳳翔灞上。鴻志蝟毛之反者。霧委來庭。觸柱拔山之大盜。風馳獻款。三晉子弟。共獯獷而陪靡。咸秦豪傑。連巴蜀而響應。英聲西被。懋德東漸。南諧交趾。北變幽都。躬未戎衣。手不提劍。機務成於雄斷。人傑得於才子。威加四海。功出一門。計極萬安。戰窮百勝。小往大來。算無遺策。時未期月。業倍前王。今古代興。膺斯撥亂。若茲之舉。如茲之速。載籍以來。未之前聞也。臣等誠歡誠喜。頓首頓首。死罪。竊以陛下承家開國。積



德累功。世濟擬於高陽。續緒盛於周武。載誕燭神光之異。儀形表玉勝之奇。白雀呈祥。丹書授曆。名合天  
淵。姓符桃李。君堯之國。靡不則天。星紀云周。奉時圖始。甲子之旦。不俟而□起兵西北。勢合乘乾。我來自  
東。位當出震。至八井深水之圖讖。唐李樹之驍歌。固以備在人謠。無德而稱者也。且夫體非常之道。立  
非常之功。實非常之人。有非常之事。不時正位。人神佇式。天命不常。惟德是與。遷虞事夏。抑有前規。臣等  
敢錄舊典。奉上尊號。當今萬機曠主。九有困窮。伏願降鑒回慮。憂世外己。上順天心。祇膺允執。俯從人願。  
屈就樂推。變黎庶于時雍。配上帝于宗祀。勿以王者兼濟之功。而爲匹夫獨美之操。昔之堯佐。咸大天工。  
績尤著者。胤饗稷高播穀之都。餘慶商周。臯陶好生治人。今與陛下。盛德有後。其若是乎。四相三王。齊名  
踵武。千年得一。相繼風聲。符命所鍾。有自來矣。願納縉紳悽悽之情。允副億兆顛顛之望。率土更生。含靈  
幸甚。臣等誠惶誠恐。昧死以聞。頓首頓首。死罪死罪。所司以表意奏聞。帝退所奏表。謂奏者曰。吾固知如  
是。拒而不答。裴寂等進見曰。昔桀紂雖復不賢。亦各有子。未聞湯武臣輔之。龜鏡已見。茲無所疑也。先人  
有言曰。功蓋天下者不賞。陛下欲讓至尊而爲臣下。恐隋朝不然此事。且臣等唐之將佐。茅土大位。受之  
唐國。陛下不爲唐帝。臣等應須去官。伏願深思。容臣等有地。帝笑曰。裴公何相逼之深。當爲審思。亦未之  
許。裴寂等又依光武。長安同舍人強華奉赤符故事。乃奏神人太原慧化尼。蜀郡衛元嵩等歌謠詩讖。  
慧化尼歌詞曰。東海十八子。八井喚三軍。手持雙白雀。頭上戴紫雲。又曰。丁丑語。甲子深藏入堂裏。何意  
坐堂裏。中央有天子。又曰。西北天火照龍山。昭童子赤光連北斗。童子木上懸白旛。胡兵紛紛滿前後。拍

手唱堂室。驅羊向南走。又曰。胡兵未濟。漢不整。治中都護有八井。又曰。興伍伍。仁義行。武得九九。得聲名。童子木底百丈水。東家井裏五色星。我語不可信。問取衛先生。蜀郡衛元嵩。周天和五年閏十月作詩。戌亥君臣亂。子丑破城隍。寅卯如欲定。龍蛇伏四方。十八成男子。洪水主刀傍。市朝義歸政。人寧俱不荒。人言有恆性。也復道非常。爲君好思量。何□□禹湯。桃源花□□□李樹起堂堂。只看寅卯歲。深水沒黃楊。未萌之前。謠讖遍於天下。今觀其事。人人皆知之。陛下雖不以介懷。天下信爲靈効。特此欲作常□□□以免。須上爲七廟。下安萬民。旣膺符命。不得拘文牽旨。違天不祥。裴寂等言之甚切。帝曰。所以逡巡至於再三者。非徒推讓。亦恐羣公面諛。退爲口實。然漢高云。諸侯王推高于寡人。以爲皇帝位。甚便宜於天下之民。則可矣。孤亦何能有異之哉。於是寂等再拜舞蹈。稱萬歲而出。遂與國子博士丁孝烏等數百人。具禮儀。擇良日。以武德元年。歲在戊寅。五月甲子。皇帝卽位於太極前殿。設壇於長安城南。柴燎告天。冊文曰。皇帝臣某。敢用玄牡。昭告于皇天后帝。生人以來。樹之司牧。瞻命所屬。謂之大寶。曆數不在。罔一作或偷安。故舜禹至公。揖讓而興。虞夏湯武兼濟。干戈而有商周。事乃殊途。功成一致。後之創業。咸取則焉。某承家慶。世祿降祉。曰祖曰考。累功載德。賜履參墟。建侯唐舊。地居戚里。門號公宮。不緒建基。足爲榮矣。但有隋屬厭。大業爽德。饑饉師旅。民胥怨咨。謫見咎徵。昭於皇鑒。備聞卑聽。所不忍言。某守晉陽。馳心魏闕。授手濡足。拯溺救焚。大舉義兵。式寧區宇。懲邊荒之辮髮。輯兆庶之離心。誓以捐軀。救茲生命。指除喪亂。期之乂安。有功繼世。無希九五。惟身及子。竭誠盡力。率先鋒鏑。誓以無二。再蒙弘誘。克濟艱難。電掃風驅。

廓清大邑。傳檄而定。峨帽拱手而平。關隴西戎卽斂。東夷底定。非啓非贊。孰能茲速。尊立世嫡。翼奉宗隋。戮力輔政。無虧臣節。值鼎祚云革。天祿將移。謳歌獄訟。聿來唐邸。人神符瑞。輻湊微躬。遠近宅心。華夷請命。少帝知神器有適。大運去之。遜位而禪。若隋之初。讓德不嗣。羣情逼請。六宗闕祀。七政未齊。罪有所歸。恐當天譴。請因吉日。克舉前典。設壇肆類。祇謁上帝。惠茲下人。翼子謀孫。罔敢愆德。則小則大。無或有違。對越鴻休。伏深慚懼。謹遣太尉公裴寂等。用薦告之禮。瑞冊蒼璧。秬鬯清酌。薌合薌其。明粢嘉蔬。禋祀于皇。皇后帝。明靈降享。□□備羽儀法物。臨軒大赦天下。改義寧二年爲武德元年。□□□□□□祚。有司以子卯不樂。請擇他日。帝曰。歲在戊寅。□□□□□□始此爲難得。至今遇之。烏可失之。且殷周二代。□□□□□□所之以爲大吉。同域之誠。又甲于五行爲木。木加于子。□□□□良日。雖欲勿用。其能捨諸。故自起軍。逮乎入相。登極。咸用甲子焉。

安撫太原卽私喜以爲天授。而突厥達官亦曰。唐公天所與者。又曰。天將以太原與唐公。而帝復曰。地名賈胡。天其假吾比胡以成王業。及獲青石龜文。又曰。上天明命。賜以萬吉。明乎知天命之有歸矣。至于晉陽夜光。及法律子桃李子白雀紫雲種種符瑞。而又加以亢陽膏雨。遠近思附。大郎二郎一同義士等其甘苦。欲不代隋。不可得已。甲子之期。乃曰相逼之甚。真盛德耶。溫公與開國功臣。其鋪揚點綴之芳密也。湖南毛晉識。



余嘗謂太宗長自生貴。體足甘繡。未祛幼志。便規大寓。運策則伏肉翰飛。捉刀則凶鯁魚潰。英雄見之心死。夷夏歸若景赴。尊宅九有。猶爭藻士之能。誅定萬方。還證蔗王之業。斯固資擅文武。助高圖籙。既孤往載。少靈來胤者。而此注僅與隴西方駕。齊國聯鑣。睠此瓌才。不殊典品。遂使跡已陳于千禩。疑忽生于單帙。非懼事戾人經。父在無自專之義。當由身觀國史。化家爲溢美之言矣。

繡水沈士龍跋

創業起居注。自起義旗至卽真。僅三百五十七日事耳。其中所載。破歷山飛。斬宋老生。及入關下都城數段。亦自寫得雄快。第殺王威。高君雅事。不若劉會政傳宛委詳致。若所稱高祖始爲太原。便自以爲天授。此似不必始于太宗。然晉陽宮婢哭諫旋師。乃舉義最大節目。何可抹煞。大抵載筆時。建成方爲太子。故凡言結納賢豪。攻略城邑。必與太宗並稱。其後雖太宗卽位。豈書藏禁祕。不遑竄改耶。

武原胡震亨跋





鑑

唐

異考附

(一)

撰 禹 祖 范  
注 音 謙 祖 呂

本館據金華叢書  
本排印初編各叢  
書僅有此本



# 重刻唐鑑音註序

古來音註之家。經爲多。史次之。如裴駟、司馬貞、張守節之於史記。顏師古、章懷太子之於兩漢書。研覈詳明。折衷至當。尙矣。最後則胡三省資治通鑑音註。足與古人方駕。而求其簡要不煩。洞達治體。則惟呂成公所著范學士唐鑑音註。尤萬世君人者之金鏡焉。按唐鑑十二卷。學士官編修時。與司馬溫公修通鑑奉詔而作。學士分掌唐史上自高祖。下逮昭宗。嘗於編次之餘。稽其成敗之迹。挈其宏綱。繫以論斷。元祐初。表進於朝。上嘉納之。宋高宗嘗與侍臣言曰。讀資治通鑑。知司馬光有宰相度量。讀唐鑑。知范祖禹有臺諫手段。其推重如此。惟朱子語錄。謂其議論近弱。且病其有治人無治法。晚年作社倉記。則亟稱之。以爲不易之論。而自悔前言之誤。蓋朱子亦深佩之。成公不好議論。不立門戶。先之以音義。繼之以註釋。其間是非褒貶。無不以學士爲準。註成。分爲二十四卷。較原帙增其半。我朝嘉慶間。睿廟詔示羣臣曰。范祖禹所著唐鑑一書。臚敘一代事蹟。攷鏡得失。其立論頗有裨於治道。因命館臣倣其體例。輯爲明鑑。蓋以取鑒前代。亦卽殷鑒夏。周鑒殷之意也。顧安得成公其人起而音註之。俾與唐鑑并傳不朽。以爲萬世君人者之金鏡哉。同治十年冬十月。同郡後學胡鳳丹月樵甫謹序。



# 進唐鑑表

臣祖禹言。臣竊以自昔下之戒上。臣之戒君。必以古驗今。以前示後。禹益之於舜。則言其所無于佚于樂。書大禹謨。益曰。吁戒哉。罔失法度。罔游于逸。罔淫于樂。傲虐之作。防於未然。書益稷。禹曰。無若丹朱。傲虐是作。周召之於成王。則相古先民。書召誥。相古先民有夏。天迪從子保。面稽天若。今時既墜厥命。今相有殷。天迪格保。面稽天若。今時既墜厥命。又我不敢知。曰有夏服天命。惟有歷年。我不敢知。曰不其延。惟不敬厥德。乃早墜厥命。我歷年墜命。既墜厥命。又我不敢知。曰有夏服天命。惟有歷年。我不敢知。曰不其延。惟不敬厥德。乃早墜厥命。日陳於前。皆所以進哲德而養聖功也。臣祖禹誠惶誠懼頓首頓首。伏遇皇帝陛下。庶人傳言百工執藝。書胤征。工執藝事以諫。獻之先帝。庶補萬分。比臣赴職。不幸先帝遽揚末命。伏遇皇帝陛下。嗣膺大統。睿智日躋。詳延耆儒。啓沃聖學。書說命。啓乃心。沃朕心。監於前代。唐褚遂良傳。太宗曰。朕監前代以爲元龜。宜莫如唐。儀刑祖宗之典則。詩周頌。儀式刑文王之典。日靖四方。四方承式。萬世永賴。書大禹謨。帝曰。萬世永賴。時乃功。臣之此書。雖不足以發揮德業。廣助聰明。拳拳之忠。不能自己。苟有所得。不敢不告。輒以狂悖塵玷日月。罪當誅死。伏惟清閒之燕。少賜省覽。其唐鑑十二卷。繕寫成六冊。謹隨表上進。以聞。臣祖禹誠惶誠懼頓首頓首謹言。元祐元年二月二十八日。承議郎行祕書省著作佐郎騎都尉賜緋魚袋臣范祖禹上表。

又上太皇太后表

臣祖禹言。臣聞觀古所以知今。彰往所以察來。易繫辭。夫易所以彰往察來。唐於本朝。如夏之於商。商之於周也。厥監

不遠。著而易見。臣祖禹誠惶誠懼。頓首頓首。臣頃在書局。多歷年所。書君爽云。不勤而祿。無補聖世。神宗皇

帝明燭幽遠。一物不遺。特垂誤恩。擢置祕省。臣比及赴職。不幸先帝違豫。遽棄羣臣。不獲一覩清光。螻蟻

之志。無所復伸。臣嘗於職事之餘。討論唐史。撫其行事。緝成一書。妄以私意而發明之。可以稽參得失。監

觀成敗。伏遇太皇太后陛下。母臨萬國。天覆羣生。酌于民言。以美聖政。臣區區之忠。既無及於先帝。思報

之於陛下。是以冒昧自竭。不敢隱默。古者史爲書。瞽爲詩。百工獻藝。庶人傳語。左襄十四年。史爲書。瞽爲詩。工誦箴諫。大夫規誨。

士傳言。庶人謗。商旅于市。百工獻藝。商思不出職。交脩于上。冀以塵露。仰裨崇深。臣職文史。敢忘斯義。竊惟治亂興廢。皆起細

微。言之於已然。不若防之於未然。慮之於未有。不若視之於既有。故曰前事之不忘。後事之師也。史鄭世家云。

其唐鑑十二卷。繕寫成六冊。謹隨表上進。以聞。臣祖禹誠惶誠懼。頓首頓首。謹言。元祐元年二月二十八

日。承議郎行祕書省著作佐郎騎都尉賜緋魚袋臣范祖禹上表。

# 歷代紀元之圖

高祖 武德九

太宗 貞觀二十三

高宗 永徽六  
上元二 顯慶五  
儀鳳三

則天 光宅一 垂拱四  
萬歲登封萬歲通天一  
神功一 永昌載初一

中宗 景龍四

睿宗 景雲二  
太極一

玄宗 先天二 開元二十九  
天寶十五

肅宗 至德二 乾元三  
上元二 寶應二

代宗 廣德二 永泰一  
大歷十四

德宗 建中四 興元一  
貞元二十一

順宗 永貞一

憲宗 元和十五

麟德二  
永隆一  
天授二  
聖歷二

乾封二  
開耀一  
如意長壽二  
久視一

總章二  
永淳一  
延載一  
大足長安四

咸亨四  
弘道一  
證聖一  
神龍一

唐 鑑 唐紀元圖

穆宗 長慶四

敬宗 寶歷三

文宗 太和九  
開成五

武宗 會昌六

宣宗 大中十三

懿宗 咸通十四

僖宗 乾符六  
光啓四

昭宗 龍紀一  
光化二

哀帝 三

廣明一  
文德二  
大順二  
天復三

中和四  
景福二  
天祐一

乾寧四

# 唐鑑音註考異

郡後學胡鳳丹月樵甫纂輯

## 歷代紀元之圖

高宗 調露一。明本誤 開耀一。明本誤

則天 垂拱四。明本誤 永昌載初一。明本誤 如意長壽二。明本誤 神功一。明本誤 聖歷二。明本誤 久視一。明本

缺 大足長安四。明本誤 神龍一。明本誤在延載之下

玄宗 天寶十五。明本誤

## 唐歷代傳世之圖

額王璵。明本璵誤璵 太子瑛。明本瑛誤英

## 卷一

### 五月詔曰章

天命靡常。註·明本億多令之也·按注疏鄭箋·億多言之也·今改正

## 卷二

初定均田章

無預士伍

明本土作仕。今從通鑑作士。

卷三

帝問房玄齡章

公得其一。未知其二。

明本誤公得其一。未得其一。今從通鑑改正。

卷五

帝謂侍臣章

又曰無輕民事惟難。

明本難作艱。註同。今從通鑑改正。

卷六

凡征高麗章

戰士死者幾二千人。

明本二千人誤三萬人。今從通鑑改正。

二十二年章

或乞輸直雇潭人造船。

明本雇誤顧。今從通鑑改正。

二十三年章



俟我死。汝於後用爲僕射。明本俟誤然。今從通鑑改正。 狙詐之術也。明本狙誤徂。註同。今從揚子問道篇改正。

右太宗章

而功烈過之矣。註孝文加之以恭儉。明本加誤如。

卷七

帝欲廢王、皇后章

註 書罔命。繩愆糾謬。  
明本謬誤繆。

弘道元年章

帝聞之怒曰。明本怒作怨。今從通鑑改正。

卷九

二十五年四月章

悅禴祥。註寶真符。明本真作貞。今從通鑑作真。

四載正月章

言有呼萬歲者。註。御史乘鷹在廟旁。明本史誤吏。旁誤勞。

卷十

十一載章

陳希烈與國忠鞠之。明本鞠  
誤鞠。

哥舒翰章

哥舒翰軍於潼關。明本舒  
誤蘇。蕃將火拔歸仁等。明本火  
誤大。又促哥舒翰出兵潼關。明本舒  
誤蘇。

卷十一

至德元載章

哥舒翰守潼關。明本舒  
誤蘇。

帝在靈武章

大將管崇嗣。明本崇誤仲。今  
從唐書改正。

文部侍郎章

琯謂人曰。明本謂  
誤為。琯性高簡。明本性  
誤惟。明年罷琯為太子少師。明本少師  
誤太師。

九月廣平王章

亦有微盧彭濮。註。屬文王者國名  
明本屬誤蜀。

九月命郭子儀等章

殖綽、郭最曰。明本缺一郭字  
今補入。

九月制去尊號章

月皆以之所建爲數。明本缺一以字  
今補入。

卷十二

十年十月章

而殖綽、郭最見獲。註·止·將爲三軍·明本  
三誤一·今從左傳改正。

三年四月章

則四夷復侵。註六月詩·明本六  
誤交·今改正。

卷十三

初神策軍章

而勿以儉人。註·用勸相我國家  
·明本勸誤勵。

朱泚攻圍奉天章

而銳氣不衰。明本氣誤起·今  
從通鑑改正。

卷十四

帝問陸贄章

彰我之能從。

明本缺一之字。今從通鑑補入。

帝問陸贄近有卑官章

察其事情頗似窺覘。

明本似誤以。今從通鑑改正。

由是才能者怨於不任。

明本作是由。誤倒。今從唐書改正。

五月帝使謂陸贄曰章

不若假以便宜之權。

明本缺不若假以便宜字。今從唐書補入。

卷十五

七月戶部侍郎章

欠負八百餘萬。

明本八百作三十。今從通鑑改正。

贄又奏請章

計合稅之錢

明本錢上多一賤字。係衍文。今從通鑑刪去。

杼軸空。

註。杼。盛緯器。明本緯誤釋。今從詩註疏改正。

卷十六

十二月章

撤業閉門

明本業誤業。今從唐書改正。

十九年章

皆正人也。註。固舉之以禮。明本固  
誤周。今從賈誼傳改正。

卷十七

二月章

賢者各引其類。註。前劉向傳。故賢人在上則引其類。明  
本故誤對。引誤行。類誤對。今改正。

四月章

左軍中尉吐突承瓘。明本瓘誤璵。後數卷皆  
誤。今從通鑑改正。

七月章

內則膠固歲深。明本歲作威。今  
從通鑑改正。

五年章

克自抑畏。註安國云。太王王季即祖。按書經註疏云。太王。周  
公會祖。王季即祖。明本今本均缺周公會祖四字。

卷十八

十五年章

謀立澧王暉爲太子。明本澧  
誤澄。

卷十九

長慶元年章

乃命中書舍人王起等。明本等誤華  
今改正。

帝游戲章

百官謁見。明本官作王。今  
從通鑑作官。

卷二十

四年十月章

榮辱之主也。註。榮辱之主也。言行。君子之所以動天地也。明  
本榮辱以下誤八字。缺二字。今從易繫傳校正。

會昌三年章

出師屯趙州。明本趙誤超。今  
從通鑑校正。

卷二十一

十年十二月章

詢謀僉諧。註。詢謀僉同。  
明本詢誤僉。

十三年六月章

宗實已受敕於宣化門外。明本實誤室。今從通鑑改正。故其國大亂。註。易牙有寵於公。明本寵誤人。今改正。

咸通七年章

乃得一女子之首。註。略嶺外六十餘城。側自立為王。明本六十誤卒。餘誤余。側誤便。今從漢書馬援傳改正。又注。十八年。軍至浪泊上。與賊戰。破之。明本缺一破字。今補入。

卷二十三

大順元年章

濬為岳鄂觀察使。明本岳誤兵。

乾寧元年章

師其族黨犯圍走。將自商山奔河東。明本。走。誤將。將。誤起。今從通鑑改正。

卷二十四

天祐元年章

立暉王祚為皇太子。更名祝。明本祝作祝。通鑑作祝。則諸鎮未敢窺唐也。註皆言王室未寧。雖得太原。猶非所有。明本雖得誤暫待。猶誤指。

又註。今乘危伐之。明本今誤人。乘誤爭。均從唐書張濬傳改正。

